

Dieta annuala dal Forum economic mundial WEF 2020 – Infurmaziuns impurtantas

Las autoritads da la Confederaziun, dal chantun Grischun e da la vischnanca da Tavau infurmeschan en moda cuntinuanta ed objectiva davart lur tenuta envers la Dieta annuala dal Forum economic mundial WEF 2020 a Tavau. Las suandantas explicaziuns davart la Dieta annuala dal WEF derivan da las differentas autoritads e dals differentes posts involvids.

Dieta annuala dal Forum economic mundial WEF 2020 a Tavau

1. Infurmaziuns generalas

A la Dieta annuala 2020 dal Forum economic mundial a Tavau dals 21 fin ils 24 da schaner 2020 vegni fatg quint cun var 3000 participantas e participants da l'economia, da la politica, da la scienza e da la cultura. Questas persunas derivan da var 90 differents pajais. Circa 500 collavuraturas e collavuratur da medias naziunalas ed estras rapportan sur da l'eveniment a Tavau.

Dapli infurmaziuns davart il motto e davart il program da la Dieta annuala dal WEF 2020 sin <https://www.weforum.org/events/world-economic-forum-annual-meeting-2020>

2. Impurtanza

La Dieta annuala dal Forum economic mundial è ina da las occurrenzas da la politica economica e sociala las pli impurtantas dal mund. A chaschun da la 50. Dieta il schaner 2020 a Tavau punctueschan il Cussegl federal, la Regenza dal chantun Grischun ed il Cussegl pitschen da la vischnanca da Tavau explicitamain la valor da questa occurrenza per la Svizra. Tenor lur avis èsi fitg positiv da dar alloschi a quest forum, nua ch'i vegnan barattadas opiniuns e tschertgadas soluziuns, e da cuntinuar uschia cun la lunga tradiziun da la Svizra sco pajais ospitant per conferenzas e per scuntradas internaziunalas. La radunanza annuala da las represchentantas e dals represchentants da l'economia, da la politica, da la scienza e da la cultura a Tavau porscha la pussaivladad da tgirar en Svizra en in rom spezial il contact cun bleras personalitads d'autas posiziuns. En la vischnanca da Tavau sa basan numerusas plazzas da lavur sin ils effects da congress e d'autras occurrenzas per l'economia publica e quellas e quels da Tavau èn s'exprimids repetidamain en differentas votaziuns dal pievel en moda positiva envers il WEF ed envers lur rolla d'ospitant.

3. Custs e niz

Ilis custs supplementars per la segirezza da la Dieta annuala dal WEF 2020 importan previsiblmain tut en tut circa 9 milliuns francs per il maun public. Ilis partenaris da finanziaziun surpiglian las suandantas parts da quests custs: WEF 2/8, chantun Grischun 2/8, vischnanca da Tavau 1/8, Confederaziun 3/8. Ilis detagls concernent la finanziaziun èn reglads en la missiva tar il "Conclus federal davart l'engaschament da l'armada en servetsch d'assistenza per sustegnair il chantun Grischun tar las mesiras da segirezza e tar il Conclus federal davart la participaziun da la Confederaziun a la finanziaziun da las mesiras da segirezza dal chantun Grischun en il rom da las dietas annualas dal Forum economic mundial 2019–2021 a Tavau" (Fegl uffizial federal 2018 1013, qua 1024).

Il model da trais stgalims per financiar ilis custs da segirezza vegn applitgà da princip dapi l'onn 2004:

Stgalim 1

La limita da custs per las expensas da segirezza importa 9 milliuns francs per onn. Ilis partenaris surpiglian las suandantas parts da quests custs:

Partenaris	Quota
Chantun Grischun	2,25 miu. fr.
Vischnanca da Tavau	1,125 miu. fr.
Confederaziun	3,375 miu. fr.
WEF	2,25 miu. fr.
Limita da custs	9 miu. fr.

Stgalim 2

Sche la limita da custs vegn surpassada per motivs spezials, vegn applitgà il stgalim da finanziaziun 2. In surpassament da la limita da custs po per exempel resultar per ilis suandants motivs:

- in dumber extraordinariain grond da persunas protegidas tenor il dretg internaziunal sa participescha a curta vista a la Dieta annuala dal WEF
- adattaziuns pli grondas a curta vista vi dal concept da dieta dal WEF
- augment signifitgant dals custs d'alloschi per il personal da segirezza extrachantunal
- extensiun da la zona da segirezza a Tavau pervia dal dumber da persunas da proteger
- custs supplementars pervia da l'aura.

En in tal cas metta la Confederaziun a disposiziun – per tut las trais Dietas annualas dal WEF da la perioda 2019–2021 – meds finansials supplementars da tut en tut maximalmain 900 000 francs per ilis custs da segirezza che surpassan la limita da custs da 9 milliuns francs per Dieta annuala dal WEF. Expensas dal stgalim 2 che surpassan questa summa vegnan repartidas tenor la clav da repartiziun dal stgalim 1, nun ch'il stgalim 3 vegnia applitgà.

Stgalim 3

En cas d'eveniments extraordinaris (p.ex. attatgas terroristicas, attentats, smanatschas massivas u indizis concrets da commetter acts da violenza) surpiglia la Confederaziun 80 pertschient dals custs da segirezza che surpassan ils stgalims 1 e 2. Ils 20 pertschient restants vegnan surpigliads dal chantun Grischun, da la vischnanca da Tavau e dal WEF.

Ils custs dal chantun Grischun per la Dieta annuala dal WEF importan 2,25 milliuns francs tenor il stgalim 1. L'onn 2018 han las votantas ed ils votants da Tavau concludì che la vischnanca sa participeschia fin e cun l'onn 2021 cun ina contribuziun annuala dad 1,125 milliuns francs als custs da segirezza. A la contribuziun da la vischnanca da Tavau sa participescha la vischnanca da Claustra-Serneus cun 100 000 francs. Il WEF sa participescha als custs da segirezza cun ina contribuziun annuala da 2,25 milliuns francs.

L'engaschament da l'armada en il servetsch d'assistenza vegn finanzià sur il preventiv ordinari dal Departament federal da defensiun, protecziun da la populaziun e sport. Per l'engaschament da l'armada a favur dal WEF poi vegnir fatg quint tut en tut cun circa ils medems custs, sco quai ch'i resultassan, sche las unitads participadas prestassan lur curs da repetiziun regulars. Ils ultims onns èn resultads per l'armada custs da circa 32 milliuns francs per Dieta annuala dal WEF.

Il Forum economic mundial è ina fundaziun. L'onn da finanzas dal fanadur 2017 fin il zercladur 2018 ha el fatg ina svieuta da 326 milliuns francs e cuntanschì in surpli dad 1,7 milliuns francs che vegn attribuì al chapital da fundaziun. La svieuta che vegn generada da la Dieta annuala dal WEF en l'entira Svizra, è vegnida stimada per l'onn 2017 a circa 94 milliuns francs. Da quels èn circa 60 milliuns francs vegnids generads a Tavau.

L'analisa è vegnida fatga da la Scola auta da Son Gagl per incumbensa dal WEF. Ina resumaziun dal studi chattais Vus sin www.wef.gr.ch > Dokumentation > Wirtschaftliche Bedeutung.

4. Segirezza

A la Dieta annuala dal WEF a Tavau collavuran differents servetschs da la Confederaziun, dal chantun, da la vischnanca da Tavau e dal WEF. La coordinaziun è chausa da la giunta dal WEF da la Regenza grischuna (www.wef.gr.ch) sut la direcziun dal cusseglier guvernativ Marcus Caduff.

La Polizia chantunala dal Grischun sco er ses partenaris procuran per la segirezza da las visitadras e dals visitaders da la Dieta annuala dal WEF, da la populaziun indigena e dals giasts.

Pervia da las attatgas terroristicas ch'èn vegnidas commessas ils ultims onns en l'Europa e pervia da las activitads permanentas da gruppaziuns e d'organisaziuns dschihadisticas resta la smanatscha per blers pajais europeics sin in nivel elevà u aut. Da princip stoi vegnir fatg quint cun ulteriurs attentats. Il spectrum tanscha da simpels attentats exequids d'auturs unics u da gruppas pitschnas fin ad acziuns complexas realisadas p.ex. dal "Stadi islamic". L'accumulaziun d'attatgas en l'Europa e lur grond effect en las medias pudess er inspirar personas radicalisadas en Svizra da commeter acts da violenza terroristics. Las autoritads da segirezza da la Confederaziun e dals chantuns giuditgeschan cuntinuadamain la situaziun e prendan en cas da basegn las mesiras necessarias. In dispositiv da segirezza robust cun ina gronda preschientscha visibla da la polizia, cun infurmaziun intensiva e cun activitads da controlla da la polizia è necessari er per la realisaziun segira da la Dieta annuala dal WEF 2020.

Per mantegnair la segirezza e per proteger personas ed objects sa participeschan tut ils chantuns da la Svizra en il rom d'ina acziun interchantunala da la polizia. Las chombras federalas han plinavant permess acziuns da segirezza subsidiaras a favur dal chantun Grischun cun maximalmain 5000 appartegnentas ed appartegnents da l'armada per ils onns 2019–2021 (www.armee.ch/wef).

En dus secturs da segirezza è responsabla la Confederaziun:

- Per la segirezza da las personas da l'exteriur ch'èn protegidas tenor il dretg internaziunal – sco scheffas u schefs da stadis, scheffas u schefs da regenzas e commembras e commembers da regenzas en uffizi – ordinescha il Servetsch federal da segirezza sche necessari mesiras da protecziun spezialas. Sco il dispositiv da segirezza general vegnan quellas garantidas da la Polizia chantunala dal Grischun e da ses partenaris.
- Per segirar il spazi d'aria e per mantegnair la suveranità aviatica ha il Cussegl federal relaschà restricziuns per il spazi d'aria sur Tavau. Sut tschertas cundiziuns dastga il traffic aviatic civil traversar er vinavant il spazi d'aria restrenschi, sch'el è annunzià ordavant ed identifitgà. Responsabla per la permissiun è l'Aviatica militar. En cas da basegn vegnan mesiras da la polizia aviatica ordinadas e realisadas tenor las reglas e proceduras internaziunalas. Ultra da quai sto er vegnir reglà durant la Dieta annuala dal WEF il traffic aviatic da helicopters per Tavau. Pertutgads da restricziuns èn er parasguladers, dronas, eroplans da model e.u.v. (guardar <https://www.bazl.admin.ch/wef> sco er www.wef.gr.ch sut la rubrica FAQ).

5. Libertad d'opiniun e libertad da demonstrar

Las autoritads da la Confederaziun e dal chantun Grischun considereschan il Forum economic mundial sco lieu dal dialog avert. En il rom da la Dieta annuala dal WEF duai er esser pussaivel da discutir dumondas criticas davart la globalisaziun e davart il svilup da l'economia mundiala. Las autoritads spetgan dentant che las criticas ed ils critichers preschentian lur quitads, lur arguments e lur propostas en moda paschaivla.

Las autoritads grischunas èn da princip prontas da permetter er l'onn 2020 ina demonstraziun sin dumonda. Quai sut la premissa che las cundiziuns necessarias per la protecziun dals umans, da l'infrastructura e dals edifizis vegnian resguardadas.

Per realisar ina demonstraziun ston ils organisaturs far cunvegrientschas detagliadas cun las autoritads. En quest connex ston vegnir resguardads ils basegns da la populaziun indigena, dals giasts da vacanzas e dals giasts dal di sco er dal traffic. In'eventuala dumonda da demonstraziun sto perquai vegnir inoltrada uschè baud sco pussaivel (guardar www.wef.gr.ch sut la rubrica FAQ).

Sch'igl avess da dar ina demonstraziun betg permessa, prendessan las autoritads – en il rom dal princip da proporziunalitad – las mesiras necessarias per garantir la segirezza e la libertad da sa mover da las personas indigenas e dals giasts. Delinquentas e delinquents vegnan persequitads en moda consequenta.

La limita da toleranza da la polizia suonda la pratica ch'è sa cumprovada ils ultims onns: En cas da violaziuns da leschas vegni intervegnì adequatamain per uschia metter clers segns cunter la violenza. La strategia cumprovada da trais stgalims (dialog, deescalaziun, intervenziun) duai perquai vegnir applitgada er en l'avegnir en il rom da la proporziunalitad.

Per infurmar las medias e la populaziun en moda averta e cumplessiva davart tut ils aspects da dietas annualas futuras dal WEF a Tavau mainan las autoritads grischunas, en collavuraziun cun la Confederaziun e cun la vischnanca da Tavau, in center da medias extern e tgiran la pagina d'internet www.wef.gr.ch.

6. Consequenzas per il turissem

Il sport d'enviern en la regiun Tavau / Partenz n'è durant tut il WEF da princip betg restrenschì. I na dat naginas restricziuns da viagià generalas. Tavau è cuntanschibel cun il traffic public u cun il vehichel privat.

Sin tut las vias d'access per Tavau datti dentant controllas preventivas da personas, da vehichels e da bagascha. En emprima lingia sa tracti d'evitar che objects privlus possian vegnir manads a Tavau. Las controllas vegnan fatgas per proteger las participantas ed ils participants dal congress, la populaziun sco er ils giasts. Las autoritads grischunas garanteschon che las controllas sin las vias d'access per Tavau han lieu per tut las personas pertutgadas senza schicanas ed en moda speditiva. Tuttina na poi betg vegnir exclus ch'i po dar temps da spetga. Infurmaziuns supplementaras davart la situaziun actuala da traffic e da viadi stattan a disposiziun sin www.graubunden.ch resp. sin www.rhb.ch, sin strassen.gr.ch e sin www.sbb.ch/fahrplan/bahnverkehrsinformation.html.

Entaifer la vischnanca da Tavau datti territoris cun restricziuns d'access durant la Dieta annuala dal WEF. Quai èn las zonas da segirezza tar il Center da congress / hotel Kongress / hotel Hilton Garden Inn, tar ils hotels Seehof, Intercontinental e Belvédère, tar la piazza d'atterrar per helicopters Seewiese sco er sin parts da la piazza da parcar dal Parsenn (guardar www.wef.gr.ch sut la rubrica FAQ). Las personas che abitan en questas zonas da segirezza survegnan in passaport personal ed ina vignetta per lur vehichel (hotline da la Polizia chantunala grischuna: +41 81 257 58 15). Tut ils auters hotels e tut las autras fatschentas èn cuntanschibels senza restricziuns.